

Fatg sco fervent lectur da Vic Hendry:

Ina viseta a Cavorgia-sura

Alla bial'entschatta vegn jeu a stuer dar risposta sin duas damondas. Primo: Nua e tgei ei quei Cavorgia-sura? Eis ei ina tauna, in cuvel u schiglioc zatgei sco ina Cavorgia? Secundo san ins forsa dumandar tgei jeu vevi d'encurir si leu. Basta, esser eis ei in'uciva che ei svanida, svanida e curdada en emblidanza da passa 100 onns enneu. E lu, tgei che jeu vevi piars si leu? Gliez in bien ton! Jeu vi far cuort e gir che jeu seigi in fervent e passiunau lectur dallas ovras dil sribent tuatschin Vic Hendry, oravontut da ses raquens.

Fatg retschercas

Sco raquintader va el tier mei cun la plema, quei ditgel jeu era als Tuatschins! Propi fascinau mei han ils quater dil Tschespet 36, ed igl emprem dils ezs: Sut la triembla. Jeu vai lu tertgau: Si cheu vas ti ina gada e sch'ei pluess pals-fier. Denton, igl emprem ha ei secapescha giu num endriescher nua e co. Culs da Tujetsch - quels paucs che jeu vai dumandau - sun jeu buca vegnius ual lunsch. Ins vegneva plitost en cuntradiziuns. Sun lu seviults tier in Lumnezian cun la cunzina dad explotar. Igl ei quel che venda macaruns e pulenta als da Rueras e contuorn. El, che enconuscheva detg bein igl autur, ei vegnius da cavar aschia che la caussa ei stada en cuort perfetga.

Staus el liug

In bi gi essan lu Pius ed jeu s'entupai a Sedrun el «Krüzli» tier la buna niaza Imelda e – suenter in pulpiu gentar - semess sin viadi viers Cavorgia, che «serasa sin l'autra vart dil Rein da Nalps». Naven da «Sut la Gassa», ch'ins numna par'ei era il Plaun, essan nus carrai en pliras «stortas e menadas» viers ils Falluns. Il vehichel ei vegnius mess en «garascha» e nus caminai sur la punt e gia sepresenta l'emprema sorpresa: Tras las caglias da laussas e nitscholas sefureta in trutg nausch. Mond per quel arrivein nus en in «cuort mo stuffi mument sin la Crusch». Cruschs vein nus zuar viu neginas, denton il liug senumna par'ei aschia. Zatgei auter bein: la vietta «che tschancuna la tessaglia sco pendida vid terschins». A mi ha ei cuninagada entschiet a far pli cauld: Nus s'approximavan rapidamein alla «foga encunter mun» e vein lu era - senza fastedi - anflau la «miraglia da casas scavazzadas»: Cavorgia-sura! Jeu vai mirau, mirau e turnau a mirar e digl ardiment schizun catschau en sac in carpetgel dil sulom-casa! Sai buc sche ei era in dil «Stalter Monn» ni forsa dil «Casperin». Pius riev. Persesez che nus vein lu era visitau la «Triembla da Cavorgia-sura» cun lur bests che tenevan petg, quella triembla che flanca la part encunter damaun.

Descendi dil Crest Cavorgia, vein nus lu aunc visitau Misesgrond. Pius, sco anteriur pot da Cavorgia, ha saviu declarar chezer bein, naven da Plaun s. Leci tochen Nacla, Nislas, ils Bigliels e bia auter. Zanu sto en scadin cass esser stau dallas uclivas en Tujetsch, sche ei constat che ei eri da lezs onns entuorn 60. A nus vanzava aunc in liug, e buca il pli nuninteressant: la casa dil Crest, casa paterna dil Vic Hendry. Con bugen che jeu fuss entaus, e mo per mirar - per cass ch'el fuss aunc avon mann - il puffen che «cuarcia l'entira vart seniastra digl esch e strihaus cun clar-blau». Hai denton buca riscu. Bein ha ina femna cuchegiu ord esch-casa dado, denton viu Pius cun siu terment tgaun e mei, pauc pli attractiv, ha ella murmignau zatgei e serrau igl esch. Vein lu aunc contemplau empau il contuorn: Il «Crest sur casa» e si viers igl uaul forsa las «Zonas ni ils Neidis», sai buc. Essan lu caminai da «Gassa giu, sur il dutg da Vallatscha», egl auto e puspei a Sedrun, il liug da partenza.

Nus dus secumportassen detg bein

Stai leu el restaurant dalla staziun, ha Pius vuliu saver sche jeu seigi satisfatgs dalla excursiun. Quasi, vai jeu detg: Tut quei che steva sil program deno - igl autur! Lez aunc mai. Bein, ina gada sin la televisiun. El mava - zanu en Tujetsch - a vender siu cudisch «En schurnada». El veva tschentau la scatla suma-scala, denton buca senza dumandar: «Asg'ju metter co? Jeu sperel bugen che el hagi fatg quei gi ina buna «schurnada». Udiu vai jeu dallas gadas che il «Vic da Cavorgia» seigi magari forsa in tec in agen, empau originals. Lu tratg'jeu adina: En gliez cass secumportassen nus detg bein, schiglioc fuss jeu matei strusch calzeraus tochen Cavorgia-sura per mirar sin dus craps!

In fervent lectur

GR 11-10-1985